

四庫全書

集部

欽定四庫全書

集部

林蕙堂全集卷二十

四至
六

詳校官檢討

臣

劉錫五

助教臣常循覆勘

總校官編修

臣

王燕緒

校對官助教

臣

卞維吉

謄錄監生

臣

朱上林

欽定四庫全書

林蕙堂全集卷二十四

湖州府知府吳綺撰

藝香詞 中調

臨江仙

過循蜚別墅未入示子壽鶴問

曲榭翠通行還小庭紅照花枝淪連真似習家池葛疆
空解事杜牧怕情癡誰向西園高會還傳南國清安

片雲非是為催詩殷勤勞燕子惆悵謝鶯兒

贈江夏君

一自語溪同跨鳳人間多少崎嶇不關紅粉是知音
典衣春賞酒燒燭夜調琴記得黔婁當日却憐司馬而
今夜香臺上兩情深手持鸞鵲紙心愛鳳凰簪

贈扶風

歌舞筵前曾一笑當年錯認紅紅畫眉今讓白眉工暮
行巫峽雨雌拂楚臺風自愛釵痕濟楚偏憐裙褶惺

忪幾回鸚鵡罵雕籠
星嗔人喚小月怕夢疑空

乙卯九月集秋岳先生齋中

隔歲離羣還此夜
酒聲聲雜茶聲黃柑三寸大於瓶
湖山猶在眼今古自關情
座上高談同捫蝨燈前帽影偏橫
淒涼時候壯心生住須偕客去醉且勝人醒

武陵

廿四橋邊尋夜月
洞中忽泛桃花滄洲畫壁是兒家
玉環新體態錦瑟好年華
惆悵碧雲春暮一絃紅語琵琶

琵琶望夫山上掩團紗誤看簾影動不覺繡紋差

憶昔

憶昔茂陵猶覆髮相逢碧玉亭亭十年飄泊共瑤京綵
雲徒入夢白月太無情枕膝空留一語招魂已隔三
生可憐來去未分明紙衣悲大婦畫扇泣遺嬰

又贈江夏君

廡下行歌我共汝幾年同採瑤芝玉京猶喜不參差花
開携手路酒熟畫眉時漂泊紅顏應未損潘郎已著

霜髭薄情真笑白頭時
秦嘉書兩卷蘇蕙錦千絲

秋雨次辰六

歲歲江山愁宋玉天涯着處秋
風黃花時節雨濛濛
一燈啼蟋蟀四壁打梧桐
竹屋紙窗人語寂聲聲敲入
簾櫳酒酣無計問蒼翁
劍應同我冷琴已向人慵

秋岳招同山隱夜集聞雨

一夜天涯燈影下幾人同聽秋聲
玉缸新釀瀉銀餅黃
花如有約紅豆不勝情
明日江邊還折柳五更離緒

縱橫鷗波麟閣總平生為君重起舞似我不須醒

題睡起宛然成獨笑數聲漁笛在滄浪圖

世事大都堪洗耳只須枕向清流茅亭竹戶小如舟北
窓無一事睡足五湖秋看盡風波心轉定夢隨山雨
初收笛聲何處起羣鷗漁郎還笑指斜日亂山頭

蝶戀花

咏瓶內紅梅

羅浮夢斷明璫小一點唇酥吐出春光早和靖不須誇

樹繞孤山却比桃源好
翠羽啁啾簾押曉瓶裏疎枝
似向吳儂笑把酒對花花也道
莫教容易朱顏老

人日次辰六

春到人間剛半月纔過新年又是題詩節
麴蘗滿盤堆畫纈探來恰得宜官帖
綵樹銀幡纖手設釵上風輕
顫煞雙蝴蝶椒酒弄潮紅兩頰
笑看梅蕊橫香雪

春情

昨夜杏烟嬌暮雨一帶垂楊綠
到春中浦翠袖倚欄凝

不語啼鶯勸得東風住 簾外賣花聲欲度 畫將雙雙
燕尾分波去 載酒前溪人按舞 鴛鴦飛上相思樹

夜集擲筆精舍

鹿苑浮蹤聊且住 買酒留賓暫遣羈 情緒刻燭飛觴過
夜午人間幾見蘭臺聚 晨夕但教同舊雨 莫恨蓬飄
此事由來古 岸幘燈前重起舞 銀牆月到蕉紅處

寒夜和上若韻

許大牀兒難放枕 火焰金爐不救空 房冷鴉夢未成人

夢醒重檐半夜霜華滾
每到離家偏夜永綠綺無情
不作思歸引欲燃孤燈還自炯殘花更弄簾前影

香在菴

垂柳深深塵不到十畝荷田香顫紅衣笑羽扇葛巾閒
打照荷田缺處青山倒勝侶高陽同坐嘯一局文楸
鶴步松陰小雨過半亭殘日了月明又放西泠棹

丁雁水昆仲過集寓中水閣分賦

客裏偏能逢上客一片清光肯放人岑寂橋上飛觴沙

上笛此池自合名瑤席 七子重來今又一往代風流
何事人難及俯仰乾坤增太息露華應共長鯨吸

後庭宴

同閨人登愛山臺

春到庭閒臺高徑曲新橙嫩破纖纖玉携將彩袖一凭
欄南山雪淨青初足 樓開罨畫風吹巧笑酒爐才熟
杯香琴靜小鬪蛾眉綠語細怕鶯知腸斷憑花續

釵頭鳳

冬閨

燈花滴爐香熄屏風靜掩遙山碧簫誰弄衾長空五更
簾幙月和霜重凍凍凍閒尋覓無消息淚痕冰惹紅
綿溼愁難送情還種巫雲昨夜同騎雙鳳夢夢夢

唐多令

初秋

涼入葛衣鬆斜陽疊亂虹簾影外蟬語匆匆乾鵲排橋
看又過零落盡藕花紅愁極轉成慵黃花怕與逢舊

江山猶對吳儂巷口烏衣城上柳能幾日是西風

旗亭小飲有贈

霜柳挂寒塘闌干晚照黃小旗亭飛過鴛鴦高李舊遊
都寂寞腸欲斷杜韋娘紅袖一雙雙吳儂試淺粧問
相逢恐是同鄉安頓英雄何處老須醉倒酒壚傍

舟夜晚風

黃雀晚風時蘭篙入溜遲恨高城偏自參差紅藕花中
人不見晴月上水仙祠紅豆兩情癡前緣數首詩是

人間別樣相思只為無情情轉甚難說與布帆知

包二允廣文招飲次日簡之

冒雨過西窓留賓倒翠缸愛郇公珍饈非常烹出江鱗
江味美渾忘却在他鄉就裏百花香瓊霜印蔗漿似
嫌山甜雪堪嘗自是玉盤傳玉手應不比小厨娘

曾波閣玩月同雁水諸君用稼軒韻

雙鶴下縱山青天月未殘對澄波共倚朱闌秋氣著人
羅袂爽清露冷不知寒作客幾時還相逢且盡歡况

芙蓉正耐人看起舞花前仍大笑誰似我與君閒

將歸感舊

水閣帶春城桃花罵小鶯二十年重到紅亭多少煙雲
都過眼山只對故人青往事慢傷情揚州舊月明算
吾儕酒戀詩縈今夜不將鸚鵡醉明月裏片帆輕

猶記

猶記別離時梳頭病起遲向西窗細問歸期彈指黃花
都過了春又上蠟梅枝一雁寄相思紅箋小字詩料

匆忙倒寫烏絲滿紙春愁誰可數算只有杜鵑知

寒夜

斜月射回廊無憑更漏長笑歸來反是他鄉昨夜繡衾
渾似水應不為五更霜一事恁淒涼朝來斷客腸待
相逢說向蕭娘蠟燭成灰猶不了原化作淚千行

鬢雲鬆

春雨

燭花殘香篆細一陣輕寒送入鴛鴦被滴盡紅簷聲欲

碎點點絲絲學做離人淚
草邊浮枝上綴不放青苔
鬆泛東風地何處玉驄垂柳繫重門不為梨花閉

過汲山寓感舊

采蓮陂垂柳院舊夢重尋不是閒鶯燕
華髮滿頭將已倦劉阮風流記得桃花見
酒千觴珠一串剪燭西窓細語紅燈顫
謝傳不歸棋局換只愛青山不改當時面
次上若美人折秋海棠

洛川波巫峽岫種得情根腸斷還依舊
淚洒西墻苔似

繡幾點疎紅較比春來瘦
粉沾衣香惹袖移向窓紗
不怕寒蛩咒霜落玉階寒未透
伴取花枝今夜燈兒後

錦帳春

畫眉次宋轅文先生

翠幄鈎新玉
匳開早
剛照面
鳳巢蘓小
乍添檀
還渲黛
怕新粧易了
是愁難掃
向月分圖
將山傳稿
長愛煞
瑩娘才調
曉蛾春繭
細問垂楊
碧繞較人多少

一剪梅

理繡

碧煙窓下繡牀支情也
絲絲線線也絲絲最難勻
染在春時紅是花枝白是花枝
沉吟幾度費嗟咨
鶯一雙兒燕一雙兒吐絨濕却淡胭脂
誰待相思誰解相思

春情

紅樓十五沈真真昏也含顰曉也含顰
無端彈淚坐芳茵
乾了羅巾濕了羅巾
最無聊賴是初春花弄尖新
草弄尖新箇中垂柳更傷神
腰也如人眉也如人

繫裙腰

春情

春風逗出小花枝
柔腸斷早春時
羅窓睡起紅情黯
夢後堪思愁似此
幾分兒
楊柳腰圍纔半捻
裙褶淺瘦
難支便教出落能如舊
誰愛芳姿
春豔到死只留絲

漁家傲

鶯脰湖次子壽

金羽何時飛去早
平波臺上秋煙渺
野水傍天天傍草

青不了越山斷處吳山好
採菱舟並漁郎棹漁郎却
顧吳姬笑翻網得魚多白
小詩句巧浣花溪上人將老

汪園

門對琉璃千萬頃鶯花十畝連幽徑
小閣正當花絕頂
青無定春山碎疊斜陽影
得酒偶忘前日病凭闌又
被風吹醒桃葉誰人來畫艇歌聲冷
鴛鴦驚破湖煙暝

明月逐人來

元夜燈船次燕孫

樓開金粉山堆羅綺燈和月盡遮春水暖香影裏人似
槐安蟻那辨笙歌起止 最喜銀蓮倒映蘭舫接尾嬉
遊處穠桃艷李珠煙繡霧未盡東風意正是昇平天氣

定風波

六客堂和東坡原韻

紫菊含霜對郡堂
縣披黃雀蟹輸芒
勝客重來秋色裏
前事忍教蹤跡付蒼涼
今古湖山三度醉
還是六人
吟笑白蘋鄉
便較竹溪誰得似
何取尋常歌舞在金張

破陣子

放歌

少小曾工擊劍從前愛讀離騷五色文章修鳳閣十載
郎官困馬曹而今悞寶刀衣上未彈塵蹟鏡中贏得
霜毛事業漫誇能渡虎意氣猶能擬釣鰲醉來時自豪
寄友次稼軒贈同父韻

直向湖山放誕長為魚鳥經營上客座頭橫槊舞小婦
燈邊擊缶聲顛狂阮步兵世事無憑莫歎年華欲去

堪驚懷舊白門徒作賦薄倖青樓最得名相逢太瘦生
醉春風

春情

春到誰寧耐羞結泥金帶香篝倚處獨含顰
院苔圓半檐榆小有愁難賣密約勞擔待鸚鵡多無
賴隔簾小玉悄聲傳咳咳嗽花影頻搖月紋如動那人
簾外

行香子

自題小像

烏帽華顛酒眼詩肩這形容不稱貂蟬何須計較且自
隨緣去登弁嶺過雪水汎苕川平生放宕都無繫戀
只難忘紅袖風前春來結伴誰與流連且同俠少尋醉
叟學頑仙

茗中新歲

水上山前柳底梅邊啓衙齋只似荒園問君行部管領
誰偏有一湖月千嶺雪萬家煙客堂人散胡牀獨自

看春風又入新年都來幾夕甚事堪傳只連宵詠前日
醉昨朝眠

西禪寺分韻

鶴市南頭鷺嶺清幽有真觀蘭若重修初春乘興蠟屐
同遊是晉陶令唐賀監釋湯休 高樓曲檻偏宜結夏
問閒雲可肯相留支郎如許來伴羊求辨棋一局書幾
卷茗千甌

又題讀易圖

西府中樞剖竹分符春夢後一事都無傳神阿堵似者
誰歟是少狂客中傲吏老潛夫一曲紅么三生翠袖
天知道詩酒吾徒晚年學易懺悔消除有遜之六漸之
二履之初

鳳凰閣

春晴

聽朝來窻下幾聲靈鵲曉霞影透真珠幕最喜梅花臺
榭暎生紅萼把燕子芹泥乾却佳人呵手鏡裏盡情

梳掠還教安頓千秋索思昨日雨和風何等輕薄怎忍
將春閒着

青玉案

紫雲洞次辰六韻

遙看鳥道渾無路但一澗沿花去澗盡忽逢雲宿處藤
蘿日月莓苔今古撐得媧天住陰陰石磴鳴仙鼠百
狀虬龍向人舞足下分明聞客語沾衣空翠濛濛煙霧
忽作山中雨

兩同心

新燕次宗梅岑

舞煞東風一春無盡恨
片泥未穩雲廊見柳絮才經露
井怎不記王謝堂前夕陽紅冷
小院窻紗綠靜翩翻
自引喜雙雙剪股花分憶兩兩釵梁玉並更誰知漢殿
留仙那人孤影

又和梅岑鴛鴦原韻

襞翠裁朱梳襟弄羽纔經過謝客池塘又垂足湘娥澱

浦儘教他紅藕香中一隻飛舞
別有繡牀妖女挑殘
金縷描難就頸上纏綿忘不了夢邊嬌嫵剛刺到綠葉
田田停針無語

天仙子

弔古梅為雪所折次楚畹

昨夜紅亭三尺雪斜壓老梅苔翠裂玉鱗千點卧東風
相思切情難歇古香夜半生寒鐵把酒花前愁不徹
一笛臨風徒怨別何郎閣上祝花神春未絕花重接羅

浮夢醒黃昏月

殢人嬌

無題

花壓紅檐縹緲梨雲千縷睡不盡畫樓春雨翠鬟安妥
怕鸚哥傳語誰解道情在暖香深處巫峽朝行洛波
曉渡算難得柔懷如許桃慵柳困細把眉峰數人待起
又被眼波留住

月上海棠

春夜閨思

啼鴉歸到垂楊樹
弄晴霞樓角涼蟾吐青粉牆東映秋
千亂花紅處蛾眉悄閒倚雕闌不語
香浮鶴鼎留殘
炷小屏山照出蕭郎路一片青青是何人玉驄留住向
嬌娥待把閒情深訴

千秋歲

春情次少游韻

春風簾外不放春愁退
魂欲斷腸先碎金釵留寶鈿錦

字縈羅帶人去也鴛鴦六六空成對 夢向西樓會醒
剩衾花蓋山枕畔言猶在丁香枝自結松栢情難改君
不見南山帝女能填海

金人捧露盤

懷舊

憶當年全盛日在江南有英豪鶴蓋鸞駢紅樓十二鴛
鴦結隊舞春衫歡遊處銅溝金埒燕婉鶯酣 到今朝
思前事花黯黯柳毵毵胭脂梵芳草生慚雞鳴人散六

朝金粉付雲嵐東風憔悴蘭成老痛醉雙柑

驀山溪

春日登道場山

南山聳翠官閣長相望乘興選春雲訂羊求千峰直上
盤旋石磴積雪尚高寒頻着屐還拖杖雙眼隨天放
磊砢伏虎苔草留孤嶂瑤席記高踪想當年蘇髯清曠
臨池一嘯竹樹共陰森梅蕊綻松風響歸路銀蟾漾

柳腰輕

嘉樹堂席上贈劉姬

梅紅簾箔霜風軟，開樽鶴搖釵燕甚。時曾遇此宵同宴，第一鏡湖春選。大垂手，繡襪蓮移小。回頭玉梁花顫，況有清歌，哨遍向歡場。翠簫金板，嬌鶯低語，長鯨輕吸。潮頰芙蓉三變笑，分司剛得眸迴問。蘇州可曾腸斷。

洞仙歌

集寄暢園聽小奚度曲

雨餘雙屐過畫樓。花畔要與梅花訴離怨。煮山泉索取。

銀筓葡萄將傀儡且付溫柔排遣
古今堪恨處紅粉
飄零都似飛英落簾幔只對酒當歌絳燭樽前長消受
鳳絃檀串又休道傷心是東風看燕領英雄鬚絲曾染

愁春未醒

春夜聞鄰家度曲次文友贈青兒韻

梨雲猶凍鶴夢難成是東風無賴隔牆吹送六么聲管
急絃繁子夜情教蠟炬生僕原多恨奈何頻喚不醉如
醒莫問嬌嬈料他扇底自是盈盈想渡江當年桃葉

轉比鶯輕此際淒涼謝家月色滿空庭堪憐杜牧青樓
何處薄倖留名

鵲踏花翻

贈江夏君用文友語內韻

嫁與黔婁憐他道韞紅窓茶共抽書賭便教入洛當時
適越而今不曾分却鸞釵股閒來彈盡馬卿琴愁中愛
煞劉郎舞東楚浪說符分銅虎遮道鈿車人似堵共
說東方千騎此間攜手不數微之婦憑卿莫賦白頭吟

綵毫擬把青蛾補

離緒

剩雪妨花零煙着草春寒尚把遊心怯新來少喜多嗔
憔悴荀香天涯是處多離別閣邊應已誤梅花江頭莫
更歌桃葉打疊撿取羅衣寬褶無端似打相思結分
得兩處淒涼中間一箇湊合成悲咽平生不肯負蛾眉
請君試看西陵月

蘇幙遮

次上若韻

繡簾閒金鎖澁一片青苔只許離人立何處紫騮歸未
得數盡東風三月將三日沒商量無信息恨煞雙蛾
不放春愁出樓下落花紅更急鸚鵡欺人錯報門前客

又

小桃慵垂柳細檢點斜陽正在銷魂際比翼在天花並
蒂謊現天台悞中劉郎計日空長春忒易小玉無愁
不解將人替裙褶無多還更繫錦帶鬆時認得相思意

百媚娘

本意

十里春風樓閣一樣曉雲梳掠為甚相逢難放却兜的
心兒嵌着八斗才華空付洛笑煞陳王錯 多少柳稂
花弱只恨雲旒雨閣儘意風流無做作真色果然難學
風雪漫山梅破萼何處容輕薄

連理枝

離情

恨煞蘭舟蕩輕許羅衫放膽怯空房愁添滿鏡是何離
况看牀兒猶是向時鋪怎今宵難上猶記臨行樣難
把遊蹤望落葉輕狂殘花冷淡總成拋漾只堦前蟋蟀
忒多情到更深相傍

同丁韜汝飲花下憶令兄雁水先生不至

客裏西風早檻外煙波繞好句頻傳美人何處碧雲秋
香聽花間屐齒破莓苔是謝池春早莫把桐陰掃共
取金蕉香朗月華燈南皮人散幾時重到望東來飛蓋

過紅橋待芙蓉開了

風入松

丁韜汝雨中過訪曾波閣

寥陽仙院瀉紅泉
偶住畫橋偏衝泥
忽有元珍到揮松
塵溜折波圓
小子凡應題鳳
先生高比栖禪
遶池芳樹似斜川
秋色老湘煙相留
且共奇文賞
怕歸驄錦濕
連錢舊雨
何如今雨
餘年幸值忘年

林蕙堂全集卷二十四

欽定四庫全書

林蕙堂全集卷二十五

湖州府知府吳綺撰

藝香詞

長調

滿江紅

和孝威韻

春雨桃花見前夜
苔溪初漲喜良友
東來雙漿布帆無
恙白雪詩歌行
發裏青霞笑語吹
臺上更舉杯邀月有

江鱸樽堪餉 樊川夢情難漾旗亭句人空唱着遊蜂
擾擾蜜為誰釀燕市漫彈高士筑鄧林本是仙人杖問
何年乞得鑑湖歸臣無狀

贈鶴問用劉後邨韻

我友如君到此日面無寒色空幾載燕臺奏賦大梁為
客定遠侯寧因燕領景純貴豈憑龍脉向西亭握手且
歡然歌金石 行樂地螺痕碧對酒處蟾光白把奇書
相賞子瞻魯直用世正須長着眼買山未便求容膝羨

文園新有鸛鶴表非徒壁

再次韻贈季默

海內論交二十載依然壯色信此日如髯絕少可稱狂
客撒手黃金身似膽關情翠黛愁無脉把風濤歷盡總
平常心如石少年場衣拖碧豪士坐樽浮白但論兵
慷慨虬鬚都直不為聽鶯長洗耳豈須騎鶴方橫膝待
明年棹雪訪君來開蘿壁

再次韻贈子壽

聚首茗溪看明月照君顏色最喜是徽之非主龐公非
客草檄常憐胥乞腕論詩却類醫探脉共時時賭酒在
花前吞千石 賦思元豪鏤碧牀上下眸青白問與其
鋼繞何如鈎直遇寡莫看童僕面金多自屈妻兒膝且
從容携手仲宣樓書題壁

再次韻贈丁翁

汝叟何來年八十顏如童色又幾載秦淮不見尚來為
客樓護鯖分元狩味何戲曲認龜茲脉記當時桃葉小

居停分花石 瞳子裏看成碧顛毛上全非白是詩酒
都官燕鶯司直人化雲煙齊過眼兒爭花藥纔依膝嘆
虞山老句尚籠紗空留壁

和茶村來韻

秋老苕川故人來雨窓橫膝念往日歡場勝事而今非
昔阮叟尚能矜曠達盧郎未便稱榮適但錦囊佳句字
頻探金壺漆 詩酒計誰能得山水約應無失想心期
有素亮子非飾剡雪且須留棹住杜陵不礙將絲乞看

亭臯落木亂離悰真堪惜

次韻贈雪舟時茗村過茗

好友經過客同在蕭齋促膝更羨是殷勤投贈慰予從
昔名士誰能過衛玠詩人偏愛隨高適較當年杜又更
何如晴如漆 傾蓋處君相得棹舟來吾未失信風流
蘊藉無煩修飾狂草直須裙練寫新詞不用巾綃乞想
五陵裘馬正當時時應惜

岳墳次武穆原韻

南渡楊劉到此日功名銷歇只今有西陵華表標題忠
烈三字冤沉犴室土兩宮淚灑龍城月笑玉環腦後是
何人情非切一湖水千峯雪身縱死名難滅把椒漿
澆奠唾壺堪缺道上金牌人有口階前鐵像心無血只
荒祠猶自對遺宮神依闕

次楚畹韻贈元玉

李下無蹊問當代誰為逋峭最愛是文章高處儘君嘻
笑世事漫須真實相家傳自擅清平調便扣門報有俗

人來唯長嘯 林下酌溪邊釣約羊求偕德耀把頑仙
駭叟任他猜料公瑾當筵曾顧誤小紅倚笛偏能妙看
浮雲富貴只尋常頭寧掉

送家伯成赴閩臬任

棠蔭成陰十餘載種花潘縣羨驀地擢司邦紀仰承
天眷八座慈明時所少三公卓茂今重見信丈夫遭際
不尋常風雲便 文與武才真贍功與業時當建但江
南父老挽車留戀青海漸平應有日蒼生望活須頻念

待慢亭峰下荔枝香開尊勸

金山

一點青青是媧后補殘餘石向此處洪流獨砥巍然千
尺縱步欲凌鷹隼背蟠根直下蛟龍宅問當年留帶舊
風流空陳跡 山兩岸分南北水一派流今昔把天風
海月儘教收拾孤磬聲搖殘照紫亂帆影挂秋雲碧上
危樓極目送歸鴻吹橫笛

鍾偉弢邀泛畫溪賦贈

丁鶴重遊恰正遇水曹詩客更相携斜陽溪上鷺鷥分
席十里輕煙桃葉舫一橋涼雨梅花笛只錢郎宅畔數
江峯依然碧庾公扇謝公屐追勝賞俱陳迹念金門
待漏不堪重憶春樹暮雲還惜別高山流水誰相識倘
長安親舊問狂夫添吟癖

送曹秋岳司農赴西川軍府

四海傳烽問時事何堪太息公此去偏能慷慨氣凌邊
隘吾急而求應恨晚天方待治何憂敵想鳴鞭萬里過

蠶叢旌旗易 景畧坐常捫蠶安石墅曾同奕但河梁
攬袂黯然送客八陣河山斜日影兩川旗鼓清秋色願
詩篇頻與捷書來長相憶

又

江左夷吾直應在槐堂坐理誰遣作北門鎖鑰杜鵑聲
裏此日山公寧不悞當年謝傅原須起料狂瀾砥柱已
無人惟公倚 時與勢今如此去與住應難已見當前
曲突有薪莫徙兒女何關軍國事英雄要雪書生耻得

平淮重擬舊韓碑君行矣

偕余澹心過飲陳集生齋中喜周子叔秦留

仙顧梁汾繼集

多少朱門都不見開樽延客陳孺子貧居委巷偏為設
食婁護已無鯖可飽李鷹只有鱸堪憶便盤殮直足勝
華筵歡相得 橙已熟香同擘梅漸放花還摘更南皮
飛蓋不期而集醉我傾將瓶幾個泥誰典却釵雙隻想
明朝佳事好喧傳今何夕

次其年韻

四海論交問當代誰為鑒齒喜今日倡予和汝入林伊
始老子直須牀上卧先生且向山中起儘人間下士笑
如雷蒼蠅耳嗟肉食原堪鄙便蓬華寧不喜但酒酣
擊缶壯心難已坐井笑他蛙自大讀書乾得螢將死待
縱橫羽獵向長楊從吾子

芭蕉

秋色淒其動愁處一庭蕉葉猛可裏攪和風雨無端悲

切半夜不堪初夢覺幾時却似將離別況天涯又是雁
聲來情難說 看不到身邊節放不盡心中摺只閒窓
綠影交加重疊智永堦前留作紙王維畫裏添些雪聽
當年修竹讀彈文真奇絕

社集臧介子園

秋色佳哉正時在楓前菊後更喜遇楊亭勝侶移樽相
就月下橫牀依碧樹花間記曲添紅豆問今宵樂事定
誰同西園又 真不夜渾如晝吹玉笛傳金斗任酒和

清露共沾羅袖魚鳥豈知家國事盤觴且老英雄手把
浮雲指點向諸君吾何有

集開美堂再用前韻

杯酒留連人來向鶴歸之後還共到黃花開處紛紛相
就世上文章誰似錦人間眼孔纔如豆歎當年磨蝎有
眉山吾今又且莫論宵和晝也莫看參和斗只旗亭
高李醉牽衫袖北海仍逢盈坐客東山且罷圍棋手問
平生得意是何時曰烏有

三疊前韻酬余澹心

岸幘相逢正，浯叟棄官之後，最喜是平生落落荷天成。
就籬採三秋陶令菊，田荒一頃楊家豆，算古今得失總
尋常，非吾又。時易過，昏還晝，事難料，箕共斗看筵前。
鮑老郎當雙袖，抹月披風，高士腕翻雲覆雨，諸公手問
新詞，誰付雪兒歌，吾還有。

醉吟

海上閒雲緣底事，誤來京洛，向金門索米，玉階持橐，髀

肉晚銷燕市馬鄉心秋冷揚州鶴問英雄廣武近何如
渾閒却鷄一肋蝸雙角空競逐終消索儘浮沉詩酒
任天安着海上文章蘇玉局人間遊戲東方朔看兒曹
得意不尋常非吾樂

疎影

虎丘看梅

芳原雨歇白公堤下水碧浮綾纈燕尾蘋香無數鶯花
依然六朝蜂蝶孤山不入繁華夢愛小園尚堆晴雪只

美人何處霜空翠羽可憐時節 曲徑短籬幽勝昔年
曾採取為他愁絕今日重尋宮靨垂垂幾樹苔生橫鐵
也應笑我多離別那更問相思枝葉且暫將酒琖詩瓢
消得玉鱗春月

水調歌頭

聽丁翁彈南曲舊事

天寶當金盛猶記舊宜春繁華最稱南國花柳鬪尖新
歌舞六朝門巷金粉千家煙雨楚潤好精神我始欲愁

矣何事近黃昏 秋風起人世改換朱門後庭一曲不
應恰向我時聞重見白頭遺老細數新亭舊事此際黯
消魂僕本恨人耳掩淚對青樽

與詩堂偶賦

問此傳舍耳寧用疊鳩巢一時尚須灑掃何況寄鷓鴣
裝砌疎欄曲檻點綴高梧修竹結夏小團瓢恰似槐安
國龜嶺賦岿峩 詩成也酒熟矣共逍遙儻來富貴憑
教造物付兒曹且顧吾生行樂任取後人笑拙難辨鹿

和蕉起舞向明月一笛碧雲高

別其年次澹心韻

如爾才華好天意豈徒然如何湖海漂泊無處問蒼天
十載武昌寒月一夜文園秋雨燈下舞龍泉言別河梁
上淚落酒尊前貧孺子寒范叔漫求憐丈夫豪氣自
應舉步有雲煙誰似長卿詞賦領取鄴侯宰相好向古
今傳君去莫復問吾道定逢年

題汪蛟門舍人少壯三好圖

世事偶然耳鬱鬱亦奚為只須如此行樂美酒與蛾眉
更有奇書千卷自譜新詞一曲寧問古人誰吾願聊爾
爾君且待遲遲槐堂上薇省裏暇應稀平生嗜好安
得終日不相違事業已輸公等詩酒應還我輩此論未
全非請併拋綈帙醉擁雪兒歸

滿庭芳

六客堂

綺閣東偏紅亭中峙重經六客停驂庭前松栢曾聽主

賓談南極光芒不見重逢處綠鬢髣髴今朝也苔溪月
滿此會已成三坐中詞客在張華冀北庾信江南把
玉壺再酌錦字還探獨有枯槎入畫星纏裏醉倒雙柑
東風起簷花落井紅影笑春酣

題卓火傳傳經堂

跨虎英風雕龍華胄西河代有雄才楊烏寄字得自茲
淵來多少經綸心事向寒塘暫葺茅齋梅花裏牙籤萬
軸長嘯獨登臺舒懷今古際誰為管樂誰是鄒枚只

孔家殘壁不受秦灰但得一編牛角朗吟處奔走風雷
功名事青箱滿貯玉樹况盈階

壽姚東只

馬去金臺鴻飛玉塞昔曾燕市經過青樓醉卧滿眼酒
人多忽地星分湖海殘夢醒蟻散槐柯歸來後相逢漸
老華髮對山河 婆娑當此際漫言學易且自高歌况
杯浮藥玉箏倚裙羅笑問神仙富貴吾儕事肯自蹉跎
君知否當年陶侃壁有化龍梭

鳳凰臺上憶吹簫

和漱玉詞

鏡翠封奩爐香滅篆晚山青
簇眉頭記燈邊題扇花底
藏鈎寂寞蕭關人遠千萬事
總合長休無聊是早春天
氣心緒如秋 羞羞玉臺孤影
便夢入巫陽好更難留
想紫簫吹共袖倚紅樓當日
畫闌楊柳曾親見兩地情
昨而今也閒亭萱草不解銷愁

燭影搖紅

墨妙亭懷古

曲徑斜通逍遙堂外多春樹小亭深翠挂簷花舊是藏
書處草老昔年來往向公餘搜竒好古龜趺螭壁燕瘦
環肥大蘇曾許歲月遷流溪藤也有屯陽數蛟龍奔
走赴秦灰那論魚和蠹到此不堪延佇笑眉山空題好
句美人名士竒字雄文彼蒼應妒

漢宮春

贈楚畹生日楚畹後余三日也

京洛論交媿林宗邂逅季偉英豪便喜長留一榻伴夢
三刀水嬉勝事又追隨共泛清苕屈指處遽非已識多
君十載為遙 七月初逢來復恰門懸蓬矢後我三朝
丈夫有意封侯時想雲霄唾壺擊碎嚼梅花細送春醪
且驗取鬢絲未老功名寧羨兒曹

瑤臺第一層

登碧巖絕頂次燕孫

放眼吳峰越嶠愛蒼巖似赤城栢凝峰雪茶香溪雨仙

磴雲平早春遊屐勇謝客來共躡峻嶒最高處有浴龍
雙沼放鶴孤亭憑陵紫崖東畔飛泉百尺界空青蒔
珠天濶琉璃波靜兩洞初晴振衣聊一嘯問玉鸞甚地
蓬瀛舉瑤觥看霞生古木月上寒藤

醉蓬萊

坐韻海樓為顏魯公舊址

問南朝多少朱戶雕梁亂蓬殘甍此閣巍然記平原遺
跡惜賞高雲留歡晴月好句莓苔碧銷夜圖書試春簾

幙坐人百尺 晨鼓初闌葛巾無事縱覽湖山盱衡今
昔魯國當年未罵淮西賊韻海新繙鏡源初就慷慨尚
書筆大節千秋危樓幾代倚闌長息

黃鸝遶碧樹

春晴

麗景逢初霽煙收樓閣雪銷庭院砌柳宮梅正蘇紅萼
破淡黃絲軟鳳城挑菜早人與東風相見看又是幾個
迷香嫩蝶窺簾輕燕 漸覺羅窓手煖試裁縫袖溫金

前弄笛待歸來還怕杏園客散花嘆息

八節長歡

戊申元旦

荔粉桃符餞將殘臘催送新年晴霞千嶺樹藻日五湖
煙蘋洲何在登臺遠眺一城畫鼓紅絃喚起汀花陌柳
盡要爭先 尋春猶記樊川當時有水嬉勝事堪傳雪
館更題箋行樂處黃雲曾滿秋田喜今日恰又逢霽景
暄妍也應是太平有象溪山莫負樽前

金菊對芙蓉

初冬集愛山臺聽雨和澹心尖韻

雁背雲低鷺肩風冷新寒初壓晶簾正花殘短徑葉打
空簷登高已在重陽後况瀟瀟暮雨愁添憑欄處峯迷
螺影月暗犀尖客有魯直文潛向芭蕉聲裏撚斷吟
髭念小山人散桂老淮南水嬉舊事渾難問笑韓郎句
刺香奩今宵醉把彩箋同擘金碗頻拈

新雁過粧樓

西湖見倚樓者

水蘸鵝黃蘇堤畔垂楊盡染波光畫簾青粉剛靠宋玉
東牆小閣亭亭人獨立碧闌紅袖倚斜陽無言處低眸
掠鬢似有思量知他因何獨自向杏花影裏儘意淒
涼不疑客在蘭葉艇上端詳晴湖巧開一鏡便照出青
蛾雙黛長尋春去怕綠陰成幄難比伊行

高陽臺

愛山臺看月

宋郡丞汪泰亨因東坡
詩句建在吳興署中

坡老歸歟汪丞去矣湖山我又重來明月今宵多情飛
上層臺碧雲萬里無此翳把亂峯青送衙齋看千家積
水空明人在崔巍 畫欄與客徘徊愛竹陰樹色影落
莓苔荇藻交橫魚龍奮甲鬣繇水晶宮殿三更後笑庾
郎逸興難裁問黃樓誰是閒人且醉金罍

丁雁水招同觀莊緯雲目天衛公韜汝及仲
兒集八境臺分韻

霜袖垂金煙葭泛碧人間又滿清秋懷古登高一時身

在他州逋臣望闕腸應斷嘆眉山老淚難收向西風搔
首而今白髮盈頭何當飛蓋偕遊有建安才子正始
英流欲採芙蓉徒憐渺渺芳洲江關嶺海皆陳迹算還
輸沙際雙鷗且同教倚醉憑欄長嘯登樓

五福降中天

丁未除夕示內

牛衣夜半啼寒雪猶記霸陵憔悴司馬鸛裘少君鹿轂
豈意行歌散珮年華欲換笑五十明朝買臣非貴夫壻

東方莫羨此際且相慰
綠水青山作吏一家圖畫裏
歡成隊蠟鳳宵嬉青箱付與天意憑教兒輩杯從幼起
暖向春歸況當良會放却眉稍陶然須共醉

萬年歡

次韻壽弘載

坐嘯湖山笑癡頑似我老寧知至一鶴南飛前後屢聞
橫吹論序君年稱弟羨筆吐凌雲壯氣每掀髯捧手清
談蕭然竟爾長醉
霜空雁唳抱奇文東方客難班固

賓戲弔古衡今慷慨槐安天地試問臨卽滌器會時見
題橋車騎且收拾明月虹霓釣鰲海上為餌

東風第一枝

棲賢看梅次龔芝麓先生

螺碧遙峰鵝黃新柳大堤煙草初暝紫騮斜裊金鞭十
里笑花風淺瓊清粉淡抵多少夢雲慙軟只容他雙鶴
棲遲不許美人鶯燕凝睇處雪迷詩眼坐久地香吹
酒面漫誇點額含章那數綠林隋苑金樽檀板逗春心

串搖珠線問此時隴上參差可似何郎重見

春夏兩相期

將往西溪看梅夜聞風雨

問西陵有誰來往南枝約畧初放懊恨風姨拋下一天
惆悵鏤金不作護花鈴剪繡難成留春障整整斜斜聲
聲點點冷來心上銜泥燕子誰傍料玉奴今夜榻間
衾浪兩葉眉痕相向碧愁紅快羅浮夢為曉雲驚
人
人被東風葬翠幙燈昏紫陌杯寒個儂同况

換巢鸞鳳

有遺予詩者不敢答且不忍答用史邦卿韻
天妒人嬌正鸞羞覓渡鵲嬾填橋忽來燈下句如聽雨
中簫遙知堪瘦倚闌腰病因影起香隨夢銷孤眠起想
只有玉樓花照清悄鴻縹緲門掩葦蘿空把靈犀抱
揀盡寒枝壓殘金線幽怨寄懷香草頻展烏絲斷離腸
奈何欲喚青天老而今情緒憑誰問取分曉

念奴嬌

送孫無言歸黃山次曹顧菴

蘇門鸞嘯儘東華塵空離魂淒絕手把瓊簫明月下一
笛又吹橫鐵練水魚肥黃山鶴瘦溪樹饒鶯舌北窻高
卧長卿已倦遊轍試看眼底紛紜幾年人事花樣都
全別何似釣臺煙水上不問蝸蠅喧熱隴首長饒牀頭
濁酒誰巧誰為拙送君歸矣柳花正似飛雪

社集吳山望西子湖

西子嬌憨把兩峰山色偷將眉嫵做雨弄晴猶未了又

被白蘇收取桂子多情荷香無賴分付閒鷗鷺蘭亭今
日愴然俯仰千古況是如雲勝友超然臺上立馬圖
中處慷慨乾坤無限事腸斷畫船歌舞葛嶺煙霞段橋
花柳依舊西陵樹笑傾綠醕錢郎今在何許

孝威以予修峴山祠賦詞為贈即次來韻

江湖魚鳥笑年來浪寄餘不溪澳白鹿行春煙水上難
繼亭臯華躅峴首尋碑祠鄉拜主羞見寒蓬綠採蘋秋
薦偶然為禁樵牧却喜鄧尉來遊登高懷古正值朱

櫻熟王謝顏蘇山水在一放橫天遙矚風雨前川雲煙
往代冷入西窓燭洞簫聲倚為君舉酒相屬

夜飲悠然閣分得子字同子壽弘載辰六

官齋良夜論心處舊雨依然諸子閣外寒新窓影上籬
菊尚餘霜紫淺酌消愁狂歌遣興墨洒雲藍紙烏烏擊
缶醉中雙熟吾耳試看滿目湖山秋光初過也越添
深翠閒倚畫屏搔短髮說甚功名文史富貴神仙郭侯
俱有分何堪爾爾仰天長嘯古今多是如此

西湖坐雨和韻

臯亭雲靄似愁癡一段忽添嬌嫵鏡裏明眸渾似睡又
是煙迷南浦柳刺慵腰桃含淚靨紅困蜻蜓舞金烏不
見無端却恨夸父人在庾亮樓頭閒吟倚檻空把寒
鷗數密約西陵應誤了擬待來朝晴補影斷香車泥封
蠟屐其奈而今苦兩山鐘打方知日影分午

初晴湖上即事

曉霞紅徹倩羲和持取彤輪初沐林外鳴鳩催婦急不

顧鸚哥睡熟暖入棠梨輕鬆柳絮漸看花魂續倚闌一
睇南屏青翠遙矗別有寶馬鞭柔鈿車路軟芳草裙
腰蹙粉色衣香春不管儘占明湖幾曲擲眼兜鞋凭肩
穩髻處處穿花竹天應不負韶光一百零六

四十九自壽次澹心

次公狂甚只終朝獨坐愛山臺上魚鳥江湖聊自得怕
學市兒官樣衙散栽花公餘放鶴忘却稱州將開樓一
嘯此身如在圖障遙想張趙當年埋輪破柱意氣真

何壯欲效前人猶未可空憶牛衣相向塞馬功名海鷗
時世寧必分欣悵月明高興笑予何遽非亮

次閔文長歌韻

劃然長嘯看千秋史冊不堪零碎世事茫茫無一據只
愛挂冠梅尉十載冰曹一麾水國惟與山神醉虛名何
益莫誇黃霸龔遂多少江干車馬故人厚意訪我枯
魚肆欲畫荔枝難作贈說甚金鑿玉膾擬作經營羞稱
磊落笑殺劉家鬼黃紬被暖衙鼓漫驚鼾睡

過靖南侯舊壘用東坡韻

笑天如戲把世界翻覆竟成何物一霎樓臺花草過誰
管神州半壁處仲東來佛狸南下有耻誰能雪中流支
柱獨稱公覆奇傑霸圖應是天王將星宵墜薦地金
鎚發許大乾坤都斷送只有忠魂難滅怒浪翻銀危磯
橫碧猶似冲冠髮無情煙水渺然惟浸涼月

偕胡循蜚徐野君集陸蓋思高仲齋頭分得

鴨字

碧毡飄雪正窓前梅蕊又開新臘人有機雲同載酒傾
倒小花蠻榼醉眼橫天雄心問世笑把劉伶鍾烏烏耳
熱筑聲夜半相答更有秋浦文豪南州高士拈韻朱
絲鞞一曲旗亭成絕調誰許浪稱荀鴨身外浮名眼中
恠事總付風前蠟月明橫笛為予還掃陳榻

桂枝香

四十九自壽次澹心

青眸如舊把世路羊腸等閒參透可笑小兒造物種禾

生豆知非不覺年華驟只消磨沈郎腰瘦金門方朔玉
階顏駟幾番生受 向此地一麾還又嘆湖海淒涼雨
雲翻覆震澤西風吹滿浮丘雙袖雲館秋燈堪琢句是
銜觴去年時候新醅出甕好山當坐且娛清晝

飲李書雲黃門齋中觀劇

重歸丁鶴正雪霽蓬壺臘舒梅萼人向西園對酒酒酣
歌作山香初試花奴舞更催齊念奴絃索玉簫吹鳳瑤
箏排雁串珠搖落 羨顧曲周郎如昨料記拍紅紅應

自非錯響徹涼州一夜飛雲停閣英雄兒女俱陳迹算
人生惟須行樂此時耳熱烏烏擊缶古今誰若

水龍吟

送張菊人

繞城多少樓臺一春悶鎖桃花雨靈和新柳風流重見
故人張緒剪燭窻深抱琴臺敞同傾芳醕笑華陽白鶴
陡催離恨又分手蒲帆渚回憶青溪舊處兩狂生酒
歌詩舞無端小草心旌馬上鬢絲吳楚梁苑聞鷄王家

賦燕儘成飛絮把相思付與歐餘山色送君歸去

吳興放歌

六朝一片湖光蘇顏柳謝皆先輩槐安出守南柯分郡
淳于堪睡手板車前飛塵馬首奈為形累問烏程酒美
徒憐獨醒且莫道翁真醉吐吐長書恠事對青樽燭
堆紅淚狂歌擊缶酣餘耳熱笑他清悴彩筆題詩青鞵
弔古未除豪氣約洪厓俯看齊煙九點借騎鵬背

綺羅香

西湖清明

風報桐花雨吹榆片春事三分啼鴉人在湖頭正值禁
煙初熟看十里入眼風光是一歲銷魂時節又誰禁南
北峰頭紙錢却化孤山蝶樓邊紅袖徙倚聽賣餠人
過玉笙吹微笑指西陵松栢何年堪結莫等待潑火霏
微却做作打毬周折且分付簫鼓樓船載多情夜月

喜遷鶯

次原韻送閔丈歸里

池塘句得正謝客相思月梁顏色剡水拏舟苕溪載酒
纔喜癡人相惜一曲驪歌夜唱又作雪鴻殘跡回首處
是金門索米鳳池聯翼嘆息當日裏楚尾吳頭卯酉
難相值馬上談兵燈前草制十載只如朝夕冷落延津
雙劍心事不堪重憶君歸也且為余料理故園松石

永遇樂

和澹心

韻海書成亭臯咏罷有人于此公事湖中胡牀月下兼

署鶯花使白頭有分青編無據中夜壯心頻起賴相看
風塵慰藉尚有鴻妻霸子 鄆山喬木隋堤芳草何處
燕巢鳩壘半百將過五十徒讀莫辨臧三耳謝公功業
杜郎詞賦付與春婆夢裏念衡山懶殘煨芋急流將已
春從天上來

重登超然臺

雨過知春把萬壑千巖盡滿晴雲舊遊重到携取芳樽
班荆共坐嶙峋愛朝來風日較往昔益覺清芬但開昨

有春山如髻春水如鱗 依然去年醉處聽碧管紅絃
已換閒人雪帶梅鬚金舒柳帶江湖着意翻新問風流
蘇白今如在畫裏乾坤酒微醺振衣一嘯煙靄紛紛

花發沁園春

無題

艷極生愁嬌深成歎恨人恨事長有雲英未嫁道韞無
聊豈料一時都近柔腸點點怎奈取多般禁受把幾許
劍嘯書慵平分花樵香瘦 况復才華輻輳更箋裁濤

樣字臨漪手封綃托雁製錦憑魚總是痛花傷柳三生
石老何處可種蓮成藕只應也影裏人兒夢中相見巫
岫

飛雪滿羣山

愛山臺對雪次韻

四水揉藍千峰罨畫爛銀昨夜光鋪絮飛雕榭花沾綺
袖庾郎樹未全枯倚闌人叫絕莫辜負詩瓢酒壺登高
騁望騎驢寂寞誰寫灞橋圖遙見有同雲橫雉堞是

曉林青斷天映晴湖寒生肌粟雄心激發摩娑鵲尾薰
爐醉來還潑墨頻呵凍中山褐徒水晶宮近高寒玉宇
何復殊

望湘人

贈杜茶邨次鄧孝威韻

憶曹劉並駕吳楚連橫狎盟曾推時語鄧尉淒涼杜陵
飄泊中道離羣誰與十載分襟一朝連袂依然爾汝念
綈袍范叔生平攬贈翻成疑佇此地顏蘇舊處有文

章賓客留歡林淑肯勝跡而今車笠頓忘縞紵好將煙
水收成佳句題向城南棋墅且莫令千古湖山輕笑詞
人歸去

五綵結同心

賀鶴問次韻

髯蘇較懶小杜憐癡盈盈入畫枯槎誰訪山陰雪如卿
者才調濁世稱佳水嬉湖畔尋芳去清狂甚碧縷紅牙
誰知道瓊霜夜杵裁成並蒂蘭葩 淺笑九枝燈下看

神仙伴侶扇掩鸞紗賭茗書多典表杯熱管領一代風
華遙憐丹就玄霜日寧數勾漏雲砂且受用青山罨畫
洞中萬樹桃花

五日集張帶三紫蓋山房

葵英鋪錦蒲節浮瓊光陰又到天中槐砌初過雨占農
事今歲料得年豐但看時事惟宜醉而今也醒問誰容
堪憐有人來河朔一時盡是英雄 况逢赤松儔侶自
婆娑起舞老子猶龍人號三珠地稱羣玉揮箏氣吐青

虹離騷不必將天問天原是依舊鴻濛且自向芙蓉多處陶然共吸荷筒

過惠山蔣氏酒樓和其年感舊韻

幾年湖海飄零都慣猶然百尺高眠傳粉何年客曾同聽中夜急雨鳴泉三生石上精靈在空遺恨雪雁風蟬腸斷處櫻桃舊夢一時重記難全堪憐多愁多恨歎樊川杜牧曾斷哀絃回首青樓玉簫月冷血書午夜殘鵲傷心忽聽離鸞曲盼不到春草芊綿憔悴煞一窓燈

暗三更酒凍銀船

風流子

西湖

西湖兒女地長堤畔銷盡古今魂看兩嶺送青雲偷眉
色重波皺碧水學羅紋更誰處鶯調白玉管蝶舞鬱金
裙蘭葉舫頭翠觴涼月柳絲樓上紅袖斜曛忽風吹
塵世再來處已是路阻漁人空記尋香梅市索笑桃門
歎霜高水瘦鄂王祠廟渚寒花謝蘇小鄉鄰幾度斷橋

佇立惆悵黃昏

送辰六歸廣陵

春隨人共到春光好人又去匆匆正水漲蒲桃香溪畫
鷁隄垂楊柳茂苑青驄送君去棹歌回晚雪帆影挂輕
虹六代舊愁難留叔寶一篇新賦送別文通登高還
携手繁華地斜陽老盡英雄多少鷗夷留恨杜宇啼紅
問玉簫斷後誰家夜月烏衣歸去何處春風無限淒涼
心事唱徹江東

高山流水

戊申二日登學士山次辰六

春城昨夜到東風，暢幽懷，閒騁花驄，千頃繞長堤，晴波
碧浸芙蓉。登臨處，勝友相從，攀蘿陟孤巘，偏憐絕頂一
片籠嵒。笑韓陵解語，慷慨念芳蹤。苔中名賢有遺跡，
應不似玉局髯翁。官暇却旌幢，嘯傲處，獨扶筇。青山無
語，幾英雄，酹金鍾。云何坡仙，姓字尚記高峰，問千秋更
誰知我與諸公。

沁園春

悠然閣種木芍藥

半閣初成正見南山名曰悠然有疎窻六尺低纔壓帽
藏書兩架小恰如船芳樹檐頭晴嵐屋上放了晨衙即
醉眠春深矣且聘紅買綠俸裏支錢 洛陽佳種爭妍
想太白清平調可憐把護花鈴索隨時安頓移春亭慢
着意遮金盞酒醑香教歌試艷擽與東皇結勝緣吾還
笑笑當年杜牧也為花顛

四十九自壽次澹心

歷數浮生便百餘齡幾度銜杯況山青水綠時逢歲稔
物華天寶節近星迴野叟椰壺兒童竹馬逸老同登近
水臺真天幸幸唐堯帝力於我何哉 稱觴漫向官齋
怕有霜華兩鬢堆念今年厄閨黃楊短寸昨宵占復葭
管成灰磨蝎休嗟南箕漫翕一任黔雷分付來吾今曉
曉人間公輔別是雄才

子壽誕先予一日時正冬至次韻為贈

我友元龍百尺高居在此樓中憶西京春宴同吟芳樹
東堂晚食共啖油蔥草檄花前題詩馬上吐吐徒誇錦
字工呼天問問廟堂誰是衮衮諸公 開尊客有濤戎
把祝遙看海日紅正暖回宮線梅舒艷雪灰飛緹管葭
轉和風少長三年爭先一日甲子雌雄算已慵吾還笑
笑君如陳亮我愧吳融

述懷

落拓黃衫一帽東風星星鬢只候羸關畔題詩借筆

漂母祠前賣酒騎驢躍馬平生當年兒戲為甚關門獨
較書花前醉笑古人欺我擊缶烏烏 江山何處歸歟
算且去江邊學釣魚看馬卿才調何年北闕孫郎意氣
幾日東吳三尺玉龍一牀狂夢曾到大槐宮裏無呼天
語問天生如此肯老菰蘆

想想園為坦夫題

有序

樂安廷尉新齋先生志託煙霞有懷未遂
圖為想想園聊以寄意也坦夫復作想想園

圖蓋於縹緲之間存堂構之思其為想也
益悲而遠矣夜雨當杯漫成一闋

金谷樓空玉津園廢恨滿銅駝記據梧南郭賦成烏有
種花西園鄉號無何自謂羲皇不知魏晉此事憑教春
夢婆蘇門路歎迴車腹痛吾又經過 翟家雀散空羅
生子誰如仲也多向堂中聽雨徒憐載酒湖邊對月還
憶聞歌舊業都非故書猶在若有人兮帶女蘿仍長慨
慨當年結想未遂巖阿

題友人照

夫子為誰曰鄭當時抑鄭康成向梅花閣上詩同水部
菊英籬畔酒似淵明三徑長開百城獨擁笑倚南軒七
尺屏天然處有點蒼翠色月白霞青葛陂偶爾閒行
問醉踞平泉復幾曾愛獅蹲虎伏羣峰聳秀龍銜螭繞
九節能輕天與宮商地資丘壑耐久交情畫未能吾還
笑笑歐公白傳曾主斯盟

贈王秋山秋山工為學畫

天壤王郎具天下才而巧若斯向邊生腕裏撇開彩筆
薛娘針下碎襞靈絲綴就成春呼來欲活展卷同驚未
有奇真奇也比千秋圖畫高一分兒相逢別具襟期
看湖海風流一笑時笑談兵席上公髯如戟銜觴燭底
人醉如泥技至此乎誰為是者長笑翻疑不是伊何疑
爾疑紅窻金剪另有蛾眉

題高詠樓

天與才人以千丈峰當百尺樓恰遇吳季重携青鏤管

見徐孝穆披翠雲裘據榻高眠倚闌長嘯放眼乾坤復
幾州真奇絕看朝來爽翠飛上簾鉤 人間那用埋憂
只一片閒雲醒醉眸况金門舊隱文章豪邁玉山新築
水石清幽綠野何年赤松誰是巧拙寧論鵲與鳩君無
負這麴生風味車子歌謠

洞庭春色

詠鳩柴奇觚困

有序

雉城朱君羲人蓋服道好古之士也築一

室名鳴柴室之中舉無凡物其最異者為
瘿觚觚之屬凡十具一曰西母觴合之則
巨桃故一分之則兩樣故二之也次曰古
錦囊曰洞庭波曰鑑湖冠曰鯨濤曰露珠
明曰一卷書形如其名質如其形最次曰
醉綠天形肖蕉曰高士觚形則肖梧其他
酒籌韻葉七箸盤具皆取諸竹木自然之
質詭譎竒巧語之焉而不信見之焉而始

駭信惟畸人乃有畸物豈區區流俗所能
得哉予愛而玩之為賦洞庭春色一章酒
酣倚聲亦足以烏烏耳熱也乎詞曰

歡伯頻來醉鄉無事與竹木居笑彼君子者能用無用
有怪物焉曰觚不觚磊砢槎枒驚乍見迨幾度摩挲信
有夫方纔信是山川瓌異絕倒淳于崑崙料難留種
且樽前漫說蕉卷荷舒任錦袍江上頻澆麗句黃冠湖
畔可了奇書賒取月明同一七向南郭頽然共據梧長

須是把花枝笑折擊鉢呼盧

賀新郎

次子壽韻送袁兩生歸娶廣陵

似汝真佳客立亭前輕衫側帽品紅裁碧醉後偶然歌
水調吹碎江頭鐵笛且莫笑登樓岑寂試問周郎能顧
曲向年時赤壁纔推敵君好去圖鵬息藍橋本是裴
航宅況雷塘玉簫明月風流難畢鏡閣雙眉人待畫索
笑三生舊石又豈待阮家南北從此臨邛沽酒伴羨遠

山對影肩雙立齊拍手稱連壁

送鄧孝威用辛稼軒贈陳同父韻

去矣無多說記當時英雄細數管予君葛偶出便知成
小草辜負剡溪夜雪儘冷落北山晞髮此地相逢同浩
歎且青尊醉吸茗川月為起舞弄柔瑟朝來畫漿還
催別笑年來暮雲春樹幾番離合落落行藏空手板難
問圓著智骨看柳色紅亭淒絕又甚日龍文虎氣向延
津再會芙蓉鐵酒盡也腸堪裂

小集董樗亭濠上分韻

雨綠槐陰徧客窓間鶯兒無賴若來呼喚為覓廣川過
畧約笑語梅風香亂恰又遇羊欣白練盧橘黃魚新薦
酒正小開花底梁園宴濠濮興知非遠人間多少沉
湘怨笑年年賺他兒女綵絲羅扇莫問蛟龍明日事且
把紅牙低按看隔水斜陽一片萬點浮萍鋪不了被闌
干挂在垂楊綠吾醉矣君休勸

次顧梁汾寄吳漢槎韻

更有何人否聽哀笳秋風淚下斷腸千首一出榆關成
老大去日兒童非幼歎塞外遣愁無酒縱有酪漿堪痛
醉怕冰天凍損雕龍手二十載相思久 毳裘八月霜
華透擬將愁填平北海海應難勾總是才華招物忌不
信才華偏有這歲月如何消受目斷黃雲惟一哭待奇
人纔把奇才救但溼盡青衫袖

又

世態炎涼久幸如君情關患難尚多良友聞道行吟憔悴

悴甚豈盡賦窮詩瘦比自古無斯倬傺亭伯淒涼應更
遠便夜郎李白如君否容易把雙魚剖文章入庫逢
辰丑算從前幾多才子飄萍斷柳我亦生當磨蝎宿半
世五窮相守漫說是與才與壽試看君文真絕代問何
如江令歸來後同顧況常搔首

江學在清瑤嶼中和陳其年韻

屐齒穿苔據愛君家魚絲作膾雀綿披鮓坐上鬚眉人
影綠一片空潭微射有數點海鷗常下儘日狂談揮玉

塵笑人間世路羊腸怕吾醉矣心無掛 閒來潑墨珠
泉瀉記當年湖邊杜牧置身圖畫今日飄零江海上遊
倦臨邛司馬夢醒後鄰鐘初打華屋山丘休更歎看烏
衣燕子重來者今古事難憑藉

摸魚兒

九十自壽次澹心

問蒼翁神仙將相甚事可容安住少年愛說封侯好此
日茫無憑據君休語且飽啖盤中霜膾銀絲縷痴兒駭

女是天公愛惜容他厚福不用離騷句 吾生已四十
九年無故寧須別尋旗鼓丈夫櫛沐風與雨終到雲階
月戶應非暮嗟世上軟紅十丈東華土芙蓉有主看雞
犬淮南丹鑪只在青桂叢生處

春風嫋娜

丘路看桃花

問桃源何處曾賺漁郎沿嶺路汎湖光扣蘭舷又見亭
蘿煙雨忽成霞彩飛入蓬窻但有妖紅都無濕翠不辨

胭脂深淺粧十里籠將畫溪水一身疑上紫雲鄉
生
恐封姨巧妒絲絲點點到明日步障難藏傾椒醕祝東
皇尊前惜取嬌靨紅裳莫待重尋玄都仙苑且教沉醉
濯錦春江塵緣休戀怕雙扉人去題門詩在前度茫茫

玉女搖仙珮

無題

蓬山萬里瞥遇仙姿不是飄風班綴向月傳神將花點
靨總有自然佳麗眉黛誰堪比怕遙峰碧嫩似人非易

想應是鴛鴦命合便不相逢料也難已最愛下重簾燭
底杯前雨媽雲媚 何況深憐淺惜篴骨相思忍令白
頭拋棄薦枕楚臺吹簫秦苑未似而今稱美紫袖肩同
倚雕蘭畔還把紅蘭香藝願莫忘長生夜語西陵松栢
久長情意如辜誓他年試檢雙鴛被

多麗

贈內

夢兒中猛喚一聲堪惜幾年來狂多醉少不逢些好消

息又長安杏花紅處看他人上馬顏色青草衣袍黃花
顏面一牀寒雨愁空滴牛衣冷籠頭布帽燈影弄餘碧
三更後封侯枕上醒來無跡笑人裏平原絕少那有
黃金迎客為伊行冷心溫熱又重把瑤壺共擊碧碗澆
愁紅衫搵淚鸛裘沽酒陶家甕更憐取歌成五噫同讀
還同譯臨卽去秋雨茂陵忍添鸞隻

法曲獻仙音

虎丘懷古和韻

海湧峰頭舞殘歌散猶認舊家南國金虎蒼茫玉魚零
落短簿何堪收拾只留取荒臺下點剩生公石 今何
日歎時時醉紅低翠儘意把劍鐵花磨蝕搔首我重遊
問何處水犀遺跡霸業銷沉又寧論樓臺金碧但畫船
歸後淒然雨鐘煙笛

鶴冲天

題錢稊粉舍人小像

採花陸渚客夢來尋處春晚得吟箋相思句山陰挈一

葉別館臨秋留住畫裏人堪侶煙波點染宛在綠蘋蒼
芣金華早暮起草催君去肯任把白石溪中煮且鸞
臺鳳蠟細數盡銅龍雨鑑湖他日許長條繫艇着我共
傾幽緒

乳燕飛

五月八日諸子過集聽松書屋和東坡韻

老樹陰連屋映朱闌碧池新漲燕教雛浴柳外屐聲來
勝侶善賦都如宋玉試荀香漫煎黃熟席上簷花清影

亂看銀蟾正照屏山曲可此際聲無竹 畫羅衫子黃
金簇向樽前回眸一笑頓忘羈獨自分樊川甘薄倖禮
豈能為我東正恨是春陰成綠況有何戡今白髮把當
年公瑾離愁觸歌罷也梁塵簸

百字令

登鬱孤臺和丁雁水觀察韻

頽然高阜獨青青攬盡兩江江色浪跡偶來頻弔古臺
榭已憐非昔竹樹遺墟藤蘿夕照不見當時客淒涼惟

有暮雲千里凝白 聞說叔子公餘季方才妙曾着臨
川屐我似東坡還過海空愛韓陵孤石望闕神遙登樓
夢杳往事懷邀笛何時歸隱草堂山北之北

南浦

鮑子韶邀集蓮社菴即送家觀莊入粵

參軍鮑照愛携蠻榼趁秋光來值芙蓉城主逸興滿瀟
湘走馬大堤沙軟到雞園竹下擁胡牀把兩江煙水盡
收金竿點染付奚囊 耐耐荻花楓葉正颼颼淒絕似

潯陽腸斷河梁分手更卧病清漳自是旅遊無好況人
留人別總堪傷賴庾公還把一天風月好平章

金明池

集曾波閣

白鶴珠宮蒼龍玉沼司馬浮踪暫息砧杵動離心欲冷
有令雨舊雨上客過虹橋皂蓋飛來總踏亂幾畝寒山
秋碧向竹裏行盤花間弄葦共道西園重集可怪雙
江帆影急把好夢吹殘勝遊空憶風中曲瓊簫競響波

上月錦燈同色况芙蓉地主情多便折柳旗亭怎生消
得且儘銜杯擘箋分韻莫負清宵瑤瑟

林蕙堂全集卷二十五

欽定四庫全書

林蕙堂全集卷二十六

湖州府知府吳綺撰

填詞

題情

二郎神

情多少這愁城奈無端繚繞幾幅鸞箋辭絕妙偷看燈
下反教添害心焦懊恨鶯簧搬關巧罵東風桃花知道

帶痕交笑休文翻似恁瘦損宮腰

集賢賓

真真艷影難畫描怕因病多嬌終不似前春無病好對
青天空守長宵嫦娥自老怎耐得雙星相笑誰可告這
情緒怎憑青鳥

黃鶯兒

密意托紅綃一絲長一派拋也知蠶盡絲難了心香自
燒心旌自搖文圍病渴無人曉把詩敲只怕你庭前咏

絮愁侶絮飄飄

琥珀猫兒墜

新詞滿紙何處問根苗
日出當心雨未消
黃連啞口暗相嘲
迢迢難道是如影兒的雲英
只會向夢中瓊島

尾聲

護花生怕金鈴小
終日把封姨祝禱
你莫要雪裏寒梅
損半梢

九日泊駕湖憶內

二郎神

霜花剪歎柔腸與孤帆共捲六尺蓬窗無幾扇裝來離緒那堪恨萬愁千宋玉悲涼騷屈怨都砌就相思一片影淒然洒青衫秋風淚落燈前

集賢賓

秦臺跨鳳思那年記同到湖邊畫省金門攜手遍向槐安一霎留連俄延月蹇又了却書生前件人不遠看淚影模糊雙眼

黃鶯兒

歌吹恨鄰船猛驚回夢不圓
鴛幃想你也今宵倦長卿
俸錢淵明秫田歸來百事愁
難遣意懸懸黃花消瘦無
計慰金鈿

琥珀貓兒墜

三更酒醒擁被不成眠
豈是臨風泣斷猿
一生難負是
嬋娟顛連到不如廡下周旋
免教縈牽

前腔

幾番惆悵悞我是龍泉一曲商歌起扣舷蕭蕭紅葉舞
江煙休憐笑破鏡團團青天難見

尾聲

鴛鴦飛去情波滿便有酒何人相勸恨只有煙雨樓空
莫問天

傷逝

醉扶歸

紅樓咫尺青天遠記當時曾貯小嬋娟嘆陌上相逢也

竟無緣空教影向巫山現
崔徽圖裏拾金鈿
算認得個春風面

步步嬌

誤却韶華是鶯和燕
有約何曾踐
尋花小杜顛
弔下相思春紅一片
血泪染冰絃
向海棠難喚東風轉

江兒水

說起題門事
重來總枉然
看行行墨染是齊紈
扇顚顚情圓是明珠串
絲絲繡結香囊線
贈答徒勞黃犬恨
煞

罡風猛地把藍橋波濺

園林好

寫紅箋千般繾綣掩翠袖一生哀怨道嶺外種梅方便
誰料取上青天誰料取阻黃泉

五供養

虛名留戀想賭茗描書好事難圖素娥奔夜月紫玉化
春煙都是我南柯短促反辜負玉人良願只索向孤月
下百花前紅么點字哭飛仙

僥僥令

青衫徒有恨錦字倩誰傳欲訪鴻都人何在再莫向春
山聽斷猿

尾聲

梨花落盡成秋苑掃不斷墓門蒼蘚只恐你一點貞魂
學杜鵑

且歌

中呂粉蝶兒

蟻散槐衙小南柯紫衣歸乍感天公賜與煙霞破青衫
將血淚隨風揩抹為蒼生打動嗟呀何曾有別般牽掛

醉春風

當日個說意氣傲孫劉論文章高賈馬清平三曲醉沉
香暢好是俊也俊豈料把半世孤懷一生豪氣都做了
五湖閒話

普天樂

碧波前蒼山下做幾件驚天動地衙一味費嘴磨牙甫

能得江山色氣開魚鳥兒孫大猛地罡風吹一嚇老東
方多受波查我本是排場譚家撮空博戲緊遇看個剪
綵生涯

醉高歌

聽池塘一陣鳴蛙禁得我頭皮害怕從今教折盤鈴架
把狂阮雙眸閉煞

十二月

恁狼顛顛驚來廝踢眼睜睜蟹自橫爬因甚的拏三道

兩空費却浪酒閒茶我只得破春夢一盤剩局趁秋風
八月浮槎

堯民歌

呀種些兒彭澤令醉中花栽些子東陵叟賣殘瓜有時
節正平三弄鼓兒過有時節樂天江口聽琵琶有甚麼
兜答兜答聊收笑與啼權用聾和啞

煞尾

算公卿別自有根芽笑平生即世無奸猾向青雲傳語

道干休罷待做個忍辱神仙在世上要

江夏君五十

新水令

半生踪跡不堪題感知心吾家鄉里牛衣啼夜雪象服
舞仙霓歷遍雲泥白頭的我和你

駐馬聽

憶許門楣逸少牀邊親見委旋成匹配伯通廡下早思
歸一朝扶上紫霞梯十年索盡金門米真不意千行興

慶仍千騎

雁兒落

雖則是慙王章不顧家莽張敞多閒氣倦相如早罷官
嬾靖節無生計

得勝令

我和你富貴味曾知山水事堪期子有雕龍俊孫多蠟
鳳奇

川撥棹

今日價算年華兩平分百歲矣試看那燈影離離月色
依依翠管咿咿綠袖悠悠畧畧做就兒夫首尾又何惜玉
山頽

七兄弟

和伊相攜且歸今將清閒權把繁華替鹿門從此和歌
隨任滄海紅塵起

收江南

笑人間萬事與心違問何方安穩是漁磯對梅花祝向

老來妻再相勸一杯願年年長把鳳簫吹

蘇臺懷古

錦纏道

好江山留不住年年艷陽垂柳暗金昌問梧宮當時舊
夢難忘百花洲錦帆風香波畫槳鎮時時關雞陂走狗
橫塘綠簾響紅廊教六宮人把採蓮齊唱東窓白玉牀
渾不覺螳螂相傍有多少水犀君子在三江

普天樂

捕蟬驚遊鹿上藕花殘
梧葉漾館娃宮飛散
鴛鴦楓橋火分付漁郎
把歌筵舞場一時兒任
青山冷笑興亡

古輪臺

歎茫茫無端霸業水雲荒
幻銷不盡英雄帳千秋悲
愴話到漁樵依舊是繁
華一樣燕語朱門鶯啼
綉幌一般兒錦纜與牙
樯又何曾停歌歇舞向西
風洒淚滄桑只落得生
公石上要離塚畔真娘墓
下慷慨賦詩章更誰念
高臺白露欲沾裳

尾聲

鷓鴣江上笙簫響鎮年來遊人玩賞我直要替桂子荷
花計久長

贈蘇崑生

尾犯序

風雪打貂裘鄉思驚梅客心催柳古寺栖遲見白髮蘇
侯如舊最喜是中原故老猶記取霓裳雅奏相憐處把
繁華往事燈下說從頭

傾盃序

風流憶少年不解愁游俠爭馳驟也曾向麋鹿臺前貌
緜帳裏金谷留連玉簫迤逗把豪情倚月逸氣干雲西
第南樓都付與漆園蝴蝶老莊周

玉芙蓉

滄桑一轉眸雲雨雙翻手到如今蕭蕭霜鬢如秋那此
個五侯池館爭相迓只落得六代鶯花莽不收拋紅豆
歎知音冷落向齊廷彈瑟好誰投

小桃紅

枉濕了潯江袖
還剩得蘭陵酒
儘紅牙拍斷紅珠溜青
鞋踏遍青山瘦
把黃冠撇却黃金臭
管甚麼蛟龍爭鬪
無休

尾聲

狂歌一曲為君壽
同在此傷心時候
且勸你放眼乾坤
做個汗漫游

旅懷

二郎神

歸無計向蒼天問年來怎的古寺寒鐘催客起鸛裘不
暖連朝凍雨淒其火冷秦篝香穗細笑煞人有身如寄
強添衣沈郎腰知他瘦減因誰

換頭

休提司馬文章元龍意氣救不得空囊長似洗歎人情
一似堦前雪影霏霏轉眼飄零隨逝水只落得淒涼滿
地把雄心對青觴猛可難羈

集賢賓

平生直性無是非又何事堪悲惆悵青編多破碎
賺才人無故低眉酸心冷意受用這梅花滋味宵夢美醒後
道聲慚愧

前腔

更殘夢短空自知總一味迷離畧記封侯孤帳底是依
然年少聞雞彭城古壘問豎子成名誰比吾倦矣呼取
綠醅沉醉

黃鶯兒

醉眼晚雲垂好乾坤戰骨堆簷前點滴是新亭淚鼓聲
兒是襦笛聲兒是伊英雄屈指今餘幾漫徘徊當年管
葛肯自老漁磯

前腔

勉強賦歸今便歸來轉自疑南陽不是農桑地向東籬
舉杯看東山着棋蘭成賦筆非憔悴看芳菲無言桃李
何處可成蹊

琥珀貓兒墜

人卑人辱何必合時宜得意高雲失意泥丈夫何事不
雄飛噫嘻有知我龍泉俗眼奚為

前腔

今今古古往事漫含淒猿臂將軍獨數奇蛾眉女子竟
無媒寧遲但舌在何妨歸問山妻

尾聲

山陰訪戴舟還繫休算作劉郎一例我且自扣角南山

夜掩扉

四時閨怨

瑣南枝

條風動媚景生紅
媽粉柔花徑明蜂
蝶共含情榆錢買
難剩我空閨守心
暗驚這奈何天教
人怎支領

前腔

新荷展晝漸長鶯
兒燕兒他自雙深
綠暗紗窗停針倦
還想等得我輕雷
過下夕陽只有那
小流螢暫來往

前腔

銀河見玉露溥羅衾夜涼香夢單黃葉打闌干哀蛩和
長歎正把秦箏抱不忍彈那更度南樓一聲雁

前腔

霜威緊掩綺櫳屏山四圍香獸紅梅月夜朦朧寒生玉
釵鳳空放着蘭陵酒琥珀濃歎這暖金鳧有誰共

林蕙堂全集卷二十六